

Brunner contra Schnyder

Ils dus derschaders incriminads sa dostan en vista a la tractaziun en il Cussegl grond

DA MARTIN CABALZAR/FMR

■ En ils svars actuals tar la Dretgira chantunala vai primarmain per dumondas giuridicas, latentamain dentant era per animositads persunalas tranter il parsura Norbert Brunner ed il derschader Peter Schnyder. La FMR lascha vegnir a pled ils dus «accusads».

Tuts dus crititgeschan dentant er la lavur e las propostas da la cumissiun da giustia dal Cussegl grond, scadin dentant cun renfatschas ed arguments differents. Per mauns da la debatta dal Cussegl grond han ils dus derschaders incriminads er formulà lur posiziuns a scrit. Entant che la cumissiun da giustia resp. il Cussegl grond èn responsabels per la procedura administrativa vegn l'accusaziun penala examinada d'in procuratur extrachantunala e la finala probabel decidida d'ina dretgira, saja quai dal Tribunal administrativa dal Grischun u la finala dal Tribunal federal. Fin ad ina decisiun definitiva vala per tuts dus derschaders incriminads dentant la presenziun d'innocenza.

Posiziun da Norbert Brunner

A la cumissiun da giustia che propona da stgassar sia immunitad giudiziala renfatscha *Norbert Brunner* d'esser involvida e consequentamain pregiuditgada en chaussa ed el pretenda perquai ch'ella prendia recusaziun tar la tractaziun dal cas en il ravugl dal Cussegl grond. En ina procedura giudiziala stoppian ins er respectar autras reglas ch'en ina decisiun politica, punctuescha Brunner. El pretenda che la cumissiun haja prendi sias decisiuns avant ch'avair dà ad el la pussaivladad da prender posiziun (udida giuridica). En l'infurmazuin da medias haja la cumissiun facticamain rendì public e presentenzià Brunner cun prentender che quel haja commess «ina seria violaziun d'uffizi». En in scriver posteriuor haja la cumissiun dentant confermà da betg anc avair prendi ina decisiun correspundenta. Era l'avis da singuls deputads en la pressa ch'ina pretenziun da recusaziun n'haja nagina schanza saja en vista ad ina procedura giudiziala currenta ordvart problematic. Tuttina spera Brunner ch'il Cussegl grond garanteschia ina procedura fairsa. Betg fairsa saja en quest connex la renfatscha da la cumissiun da giu-



En in'emprima runda vegnan ils svars da la Dretgira chantunala tractads l'emna proxima en la sessiun dal Cussegl grond.

FOTO YANIK BÜRKL

stia che Brunner intendia cun sia pretenziun da recusaziun sulettamain da retardar la procedura. Era sch'el na fetschia suenter las expectoraziuns da differents schefs da fracziun en la pressa naginas illusius davart la tractaziun en il Cussegl grond na possian ins betg renviar ses dretg sin ina decisiun sufficientamain motivada cun inditgar las vias da dretg per in recurs, accentuescha Brunner.

Posiziun da Peter Schnyder

La cumissiun da giustia propona al Cussegl grond da betg pli reelegger *Peter Schnyder* en la dretgira e da sancziunar el cun ina «reprimanda». Quai malgrà che l'inquisiziun entras la cumissiun da giustia saja vegnida a la conclusiun che Brunner haja efectivamain midà posterioramain ina sentenzia da recurs ed uschia sfalsifitgà documents, argumentescha Schnyder. Era cunterfetschia «ina procedura da recusaziun interna senza orientar las partidas involvidas» a l'urden dal process civil. Surstar fetschia la decisiun da la cumissiun da giustia tant pli

damai ch'ella valiteschia essenzialmain tuttina sco Schnyder ils andaments en connex cun la partiziun d'ierta S. Tenor il calcul da la cumissiun saja dentant apparentamain pli simpel d'allontanar Peter Schnyder che d'evaluar objectivamain la situaziun da mobbing en il ravugl da la Dretgira chantunala, quai che fissia stà il pensum da la cumissiun da surveglianza. Qua tras ignoreschia la cumissiun las tentativas da taschentar sapientivamain las activitads scandalusas a la Dretgira chantunala, di Schnyder. Tenor ses advocat *Jan Andri Moder* è la proposta da betg pli reelegger Schnyder perquai ina veritabla «perversiun dal dretg». Engstagl da chastiar quel che haja violà il dretg vegnia quel che haja rendì attent ils organs da surveglianza e la publicitad al malesser chastia.

Dal reminent sajan ils fatgs essenzials stads enconuscents a la cumissiun da surveglianza gia la stad 2019. «L'ulteriura investigaziun è stada chara, inutila e sbagliada», punctueschan Schnyder e ses advocat vers la FMR.

Derschaders extraordinaris

(rtr/fmr) Derschadras e derschaders temporars duain pudair rinforzar en l'avignir la Dretgira chantunala u er la Dretgira administrativa. Quels derschaders duain gidar a reducir pendenzas en temps extraordinaris per exempel sch'in derschader croda ora per pli lung temp perquai ch'el è malsaun u sch'i n'è betg pussaivladad elavurar tut las pendenzas a temp. Quai ha communitgà ier il chantun.

Actualmain n'enconuscha il dretg grischun betg in tal mecanissem. Per midar quai sto la lescha davart l'organisaziun giudiziala vegnir revedida parzialmain. La regenza grischuna ha deliberà in sboz per questa revisiun parziala. La consultaziun va fin ils 10 da settember.